



FRANCISCO JOSÉ FRAGA CIVEIRA, Portavoz e deputado do **GRUPO SOCIALISTA** na Deputación de Ourense, en base ao previsto na Lei de Bases Reguladora do Réxime Local, ó artigo 91 e 97, entre outros, do R.O.F. e o Regulamento da Corporación presenta unha **MOCIÓN SOBRE A REFORMA DO FINANCIAMENTO LOCAL** que espera sexa admitida en base á seguinte:

EXPOSICIÓN DE MOTIVOS

Pasaron 4 catro meses dende que no debate do estado da provincia se aprobou a proposta (nº 7) formulada polo Partido Socialista a prol de abordar unha necesaria reforma do modelo de financiamento local. Coa posta en marcha dun novo marco normativo, sobre todo após a aprobación da Lei de Racionalización e Sustentabilidade da administración local, no contexto da crise económica, esixíuselle ás entidades locais un esforzo financeiro e económico ante o que responderon dende a absoluta responsabilidade. Pasado un tempo máis que prudencial dende a implantación destas medidas promovidas polo goberno do Estado, é hora de aliviar ós concellos, abafados polos recortes orzamentarios, a que poidan contar con máis recursos para facer fronte ás súas competencias.

Longamente se leva falado en numerosos foros da necesidade de revisar o financiamento das administracións locais sen que, ata o de agora, se chegara a ningún avance ou acordo efectivo. Os concellos, a pesares dos hándicaps cos que se enfrontaron, teñen dado sobradas mostras do seu compromiso polo mantemento dos servizos que ofrecen á cidadanía, sendo a administración que mellores resultados económicos ten ofrecido. Hoxe por hoxe, os concellos, en termos de media, reflicten datos de solvencia económica e arrojan resultados de superávit. Entre 4.000 e 5.000 Millóns de €, concretamente, segundo datos da FEMP. Dende o Grupo Provincial Socialista consideramos que é hora de que se premie o seu esforzo e reforcemos estas institucións, as máis próximas ós cidadáns, cunha reforma do seu financiamento. Ó contrario do que se vén afirmando e que se instalou na idiosincrasia xeral, as entidades locais, sobre todo as máis descentralizadas, non son, de lonxe, as causantes do buraco financeiro que sofren as contas públicas. Lonxe disto, teñen demostrado ser as máis eficientes e racionais no uso dos seus recursos á hora de financiar os servizos que ofrecen ós veciños e veciñas, apostando, en numerosos casos, por fórmulas novidasas e creativas de procura de financiamento e aforro público sen merma destes servizos.



Tal como se afirma dende a FEGAMP é necesario que se leve a cabo unha reordenación e adaptación do financiamento local ó novo marco estrutural que se foi consolidando ó longo do tempo, e que precisa dotar ós concellos dunha maior autonomía para a prestación de servizos, que necesariamente debe vir unida a unha suficiencia financeira. Para conseguir isto, a Federación Galega de Municipios e Provincias propón que se reforme a participación nos ingresos do Estado, corrixindo as ineficiencias existentes que se materializaron en graves prexuízos para os concellos galegos. Como media, os municipios galegos contan cón 6,26 % da poboación e reciben, tan só, un 5% do montante total; supoñendo, a participación nos ingresos do Estado, en torno ao 30% do que perciben os concellos para o seu sustento. É doado de comprobar que estamos ante unha grave discriminación que se debe atallar para acadar un reparto económico xusto e equilibrado, no que se teña en conta o custo que conleva para as entidades locais asumir a prestación de servizos. Pola súa parte, a Fegamp reitera a necesidade de introducir na fórmula de reparto os criterios de dispersión, extensión territorial e envellecemento, variables que son utilizados por practicamente todas as Comunidades Autónomas nos criterios de distribución dos seus Fondos de Cooperación Local, e que son rexeitados polo Estado de xeito recorrente no reparto da PIE. Podemos comprender ata que punto afecta a unha provincia coma a nosa que non se teñan en conta eses criterios, posto que prestar calquera servizo nun concello ourensán, cos seus condicionantes, sempre vai ser máis custoso que noutras provincias do resto do Estado.

Ós prexuízos antes mencionados hai que sumar os cambios producidos no modelo de financiamento autonómico derivados da Lei 22/2009; mailo modelo de participación nos ingresos da Comunidade Autónoma dos concellos galegos, o chamado Fondo de Cooperación Local, que precisa dunha urxente reforma que aumente as transferencias correntes do mesmo, ó tempo que se reducen os fondos dedicados a subvencións e convenios cos concellos, algo que estes levan longo tempo reivindicando. No tocante ó sistema tributario local tamén debe ser abordado, realizando os axustes técnicos necesarios en cada unha das liñas tributarias. En determinados Impostos e Taxas que cobran os concellos existen ineficiencias que deben ser subsanadas, valorando a posible introdución de novas figuras tributarias adaptadas ós novos tempos. O complexo sistema competencial das entidades locais tamén esixe unha clarificación, dado que a Lei de Racionalización e Sustentabilidade, lonxe de ser unha axuda, creou incluso unha maior inseguridade xurídica e económica ós concellos. As entidades locais deben ter un marco competencial claro e contar con capacidade plena para exercer a xestión desas competencias con autonomía e co financiamento preciso para acometelas.



Por todo o anteriormente exposto, o Grupo Provincial Socialista, somete a consideración desta Corporación a seguinte:

PROPOSTA DE ACORDOS

1. Instar á Xunta de Galicia para que aborde unha necesaria reforma do Fondo de Cooperación Local, aumentando a dotación económica das súas transferencias correntes ós concellos e reducindo as transferencias de capital provintes de subvencións.
2. Esixir do goberno do Estado a introdución, na fórmula de reparto dos PIE, dos criterios de dispersión, extensión territorial e envellecemento e que se axilicen as modificacións normativas necesarias que permitan o investimento do superávit xerado polos concellos así coma aumentar o seu teito de gasto.
3. Instar ao goberno do Estado e Xunta de Galicia que aborden, de xeito urxente, a necesaria reforma do financiamento local así coma o estudo da reforma do sistema tributario das entidades locais.
4. Creación dunha comisión provincial na que, contando coa participación de expertos/as no eido da administración local, se aborden as propostas e se avalíen os avances para a reforma da lexislación local, sobre todo, no tocante á defensa dos intereses dos concellos ourensáns.

En Ourense, a 11 de abril de 2017

Asdo. O Portavoz

SR. PRESIDENTE DA DEPUTACIÓN PROVINCIAL DE OURENSE